

四庫全書

集部

欽定四庫全書

集部

宋元詩會卷

二十一

詳校官中書<sub>臣</sub>陸 湘

主事銜<sub>臣</sub>徐以坤覆勘

總校官知縣<sub>臣</sub>繆 琪

校對官中書<sub>臣</sub>牛稔文

謄錄監生<sub>臣</sub>王 宜

欽定四庫全書

宋元詩會卷二十

兵部主事陳焯編

曾鞏

字子固建昌南豐人少而警敏讀書脫口成誦年  
十一試作六論拔筆而成其詞甚偉甫冠名聲四  
方歐陽修見其文奇之嘉祐二年進士第調太  
平州司法參軍召編史館書籍遷校勘集賢校理  
為實錄簡討官出通判越州知齊州治行卓然徙  
襄州洪州加直龍圖閣知福州徙明毫滄三州鞏  
負才名久外任處之泊如過闕神宗召見勞問甚  
寵遂留判三班院加史館修撰編國史弗克成拜

中書舍人尋掌延安廳王牋奏丁母艱數月卒年  
六十五輩文章本原六經斟酌於司馬遷韓愈一  
時作者鮮能過之少文王安石爲之延譽及安石  
得政遂與之異其不獲大用者亦由失意於呂公  
著云

### 讀五代史

唐衰匪一日遠自開元中尚傳十四帝始告厯數窮由  
來根本强暴戾豈易攻嗟哉梁周間卒莫相始終興無  
累世德滅若燭向風當時積薪上曾寧廢歌鐘

### 詠史 二首

京室天下歸飛薨無餘地國士憂社稷塗人養聲利貴  
賤競一時峨冠各鱗次子龍獨幽遠聘召漠無意  
子雲無由歸俛首天祿閣君平獨西南抗顏觀寥廓無  
猜到沈冥有故驚寂寞用心豈必殊拘肆事終若

雜詩 二首

三季已千載古道久荒榛紛紛東漢士飛鳴不當辰經  
營救氛沴此志卒埃塵士生有進退何必棄其身其道  
雖褊迫其行絕緇磷公心不吾誑復求無此人

韓公綴文辭筆力乃天授竝驅六經中獨立千載後謂  
為學可及不覺驚縮手如天有日月厥曜無與偶當之  
萬象瑩所照百怪走此其自然光萬物安得有其人雖  
已歿其氣著星斗窮天破大惑更覺功業久當身止自  
善所遇時則不致官九列齊此理嗟亦苟孔孟非其稱  
斗祿應未取惜哉天下才甘受外物誘

將之江淞延祖子山師柔會別飲散獨宿孤亭遂

書懷別

蜀客向何處欲觀浙江潮  
艤舟吳門柵況會故人招  
置酒吳亭上無人吹紫簫  
浩觀萬物變颿爾生涼颿  
遂恐時節晚芳蘭從此凋  
功名竟安在富貴空寥寥

令弟南源刈稻

買田南山下禾黍忽已秋  
糟牀待此注豈止衣食謀  
窮陰迫霜霰不可遲  
孳收久苦城中囂至山  
諒優游況已除險穢  
新堂置巖幽牕軒衆峯出  
階墀水淙流良材未成  
種草樹亦已稠  
寒花開照耀谷鳥樂啾啾  
心與珍境

接佳興固已遁而況饋朝夕甘美日可按書務誠遺滯  
夜工督春揄因觀稼穡勞始覺奉養優此樂詎非幸人  
生復何求送子固自起往意不可留

庭木

庭中有佳樹清影四面垂往往風雨夜蛟龍此投依留  
之待鸞鳳未許燕雀窺誰謂鳥鳥惡安巢最高枝不顧  
白日照直傍陰虹飛自恃棲託穩豈憂彈射危三春獨  
翺翔百鳥斂羽儀鳳凰不能爭況乃鳬鴈微既務志意

得都為世可欺白晝攫鼎肉從容擇牲犧近人不肯避  
一怒終夜啼遭其瞰牆屋禍患豈可移聽之欲占赦婦  
女固已癡忿害乃其所何肯報福登行路指之歎童稚  
爭罵譏衆怒未易忽微幸亦有斯安知無刀斧崩分棄  
毛皮

追租

耕耨筋力苦收刈田野樂鄉鄰約來往樽酒追酬酢生  
涯給俯仰公斂忘厚薄胡為此歲暮老少顏色惡國用

有緩急時議廢量度內外奔氣勢上下窮割剝今歲九  
夏旱赤日萬里灼陂湖感埃壙禾黍死磽确衆期必見  
省理在非可畧謂須倒廩賑詎止追租閤吾人已迫切  
此望亦迂邈奈何呻吟訴卒受鞭箠却寧論救惟悴反  
與爭合論問胡應驅迫久已罹匱涸計須賣強壯勢不  
存虺弱去歲已如此愁呼徧郊郭饑羸乞分寸斯須死  
笞縛法令尚修明此理可驚愕

秋夜

秋露隨節至零零在幽篁灝氣入我牖蕭然衾簟涼念  
往不能寐枕書嗟漏長平生肺腑友一訣餘空牀況有  
鵲巢德辛苦茹糟糠偕老遂不可輔賢真淼茫家事成  
獲落嬌兒亦徬徨晤言豈可接虛貌在中堂清淚昏我  
眼沈憂回我腸誠知百無益恩義故難忘

過介甫歸偶成

結交謂無嫌忠告期有補直道詎非難盡言竟多迂知  
者尚復然悠悠誰可語

萬山

萬山臨漢皋，峯嶺頗秀發。  
王粲舊居處，荒草久埋沒。  
解佩蓋已迷，沈碑終自伐。  
最宜北城望，正值氛藹歇。  
縹緲出烟雲，清明動毛髮。  
留連至歸時，長見西林月。

漢陽泊舟

暫泊漢陽岸，不登黃鶴樓。  
江含岷岷氣，萬里正東流。  
驚風孤鴈起，蔽日寒雲浮。  
祇役雖遠道，放懷成薄游。  
興隨滄洲發，事等漁樵幽。  
烟波一尊酒，盡室載扁舟。

初夏有感

我從得病臥閭巷三見夏物爭滋榮  
紅英紫萼逐風盡  
高榦密葉還陰成  
山亭水館處處好  
朱碧萬實相駢擎  
林鳥梁燕各生子  
翅羽已足爭飛騰  
雉鷄五色繡新翎  
鷺鷥慕匹相隨鳴  
穴蜂露蝶亦有類  
歛往復聚何翺輕  
箔蠶滿室事方盛  
繭綬下上如連星  
麥芒秧穎錯雜出  
高壠大澤填黃青  
物從草木及蟲鳥  
無一不自盈其情  
嗟我獨病不如彼  
胷氣卧立常怮怮  
筋酸骨楚頭目眩

強食豈得肌膚盈我身今雖落衆後我志素欲希軻卿  
十年萬事常坎壈奔走未足供藜羹愁勤未老鬚先白  
多學只自為身兵自然感疾憊形體後日雖復應伶俜  
非同世俗顧顏色所慕少壯成功名但令命在尚可勉  
屑細詎足傷吾平

送叔延判官

北風吹空雪花冷平鋪雲濤冒峯頂江長水濶飛鳥絕  
沙樹參差動波影君子從戎碧油下綠髮清瞳笏袍整

危帆健櫓醉中去千里奔過猶一頃  
明年隨春到京國  
紅紫燒空折桃杏獻書又謁蓬萊宮  
新斲豪曹試鋒穎  
況遇朝廷方急材驥駉駉足當騁

地動

吾聞元氣判為二升降相輔非相傷  
今者無端越疆畔  
陰氣焰焰侵於陽陽收剛明避其勢  
陰負捷勝尤倡佯  
地東是氣抗於下震盪裂折乖其常  
齊秦晉代及荆楚  
千百其堵崩連牆隆丘傑屋不自定  
翩若猛吹搖旌幢

生民洵洵避其所如寄厥命於湖江有聲四出嘻可怕  
誰擊萬鼓何雷礮陰為氣靜乃如此天意味密寧能詳  
或云蠻荒尚侵軼已事豈必垂災祥意者邪臣有專恣  
氣象翕翕難為當據經若此非臆決皎如秋日浮青霜  
祖宗威靈陛下聖安得直語聞明堂

戲書

家貧故不用籌算官冷又能無外憂交遊斷絕正當爾  
眠飯安穩餘何求君不見黃金滿籬要心計大印如斗

為身與妻拏意氣賓客附往往主人先白頭

芙蓉臺

芙蓉花開秋水冷水面無風見花影飄香上下兩嬋娟  
雲在巫山月在天清澗素礫為庭戶羽蓋霓裳不知數  
臺上遊人下流水柱亭亭插花裏闌邊飲酒擢女歌  
臺北臺南花正多莫笑來時常著屐綠柳牆連使君宅

京師觀音院新堂

九衢言語亂人耳三市塵沙眯人目猿狙未慣囊章綬

魚鳥寧忘慕谿谷，悵無棲宿在清曠。欲弄潺湲愈煩燠，道人誰氏斥佳境。決漢披霄敞華屋，駢羅嶷嶷三秀石。叢筍娟娟兩脩竹，雲蒸雨泄被巖壑。海倒河垂動林麓，頓驚俯仰遠囂濁。豈直形骸擺羈束，解衣堅坐暝忘返。飲水清談心亦足。

曉出

曉出城南羅卒乘，早纛采旗密相映。貔貅距躍良家子，鵝鵠彌縫司馬令。奪標一一飛步疾，槃槃兩兩翻身勁。

灞上今朝且兒戲  
衛青異日須天幸

送英州蘇祕丞

遠民歌舞戴昇平  
碧閣朱樓照眼明  
鄉饌雨餘收白草  
客罇秋後對紅英  
瀧鳴真水遙通海  
路入南山不隔城  
材術如君有餘暇  
出遊應數擁雙旌

送陳郎中還京兼過九江新宅

艤舟金碧照溪沙  
帆上風吹五兩斜  
罷郡紫泥催向闕  
過江紅旆引還家  
因將舊社人攜酒  
應喜新林樹見花

莫作山齋久留意中臺虛位有清華

盆池

環環清泚旱猶深  
柄柄芙蓉近可尋  
蒼壁巧藏天影入  
翠奩微帶蘚痕侵  
能供水石三秋興  
不負江湖萬里心  
照影獨憐身老去  
日添華髮已盈簪

簡翁都官

倦遊公府曳長裾  
笑上扁舟指舊廬  
自有文章真杞梓  
不須雕琢是璠璣  
浮蛆滿瓮嘗春酒  
垂露臨牕理素書

況得君賓同壯節一鄉清問更誰如

送雙漸之漢陽

楚國封疆最上流夾江分命兩諸侯何年南狩雲檣出  
六月西來雪浪浮夏口樓臺供夕望秦川風物待春遊  
可能頻度漁陽曲不負當年鸚鵡洲

送覺祖明上人

冠石新牆日月回豐堂環殿起崔嵬鐘隨秋勢金聲壯  
佛隱寒雲玉座開流水遠奔雙澗去平林高擁四山來

麒麟細草東南路一望松門意轉哀

送撫州錢郎中

名郎元是足風流得郡東南地更幽翠幕管絃三市晚  
畫堂烟雨五峯秋黃柑巧綴星垂檻香稻勻翻雪滿甌  
應與謝公資健筆邦人才薄詎能酬

簡景山侍御

長年心事最相親一笑相疎忽數旬栢府地嚴方許國  
芸臺官冷但容身饑腸漫竊公厨膳病髮難堪客舍塵

還有鹿門棲宿興想君他日肯為鄰

遊天章寺

籃輿朝出踏輕塵拂面穆穆柳色新曲水豈能留往事  
南湖空解照行人最宜靈運登山屐不負淵明漉酒巾  
老去飄零心未折暫須同醉海邊春

錢塘上元夜祥符寺陪咨臣郎中文燕席

月明如畫露華濃錦帳名郎笑語同金地夜寒消美酒  
玉人春困倚東風紅雲燈火浮滄海碧水樓臺浸遠空

白髮蹉跎歡意少強顏猶入少年叢

雪後同徐祕丞皇甫節推孔教授北園晚步

沙草正黃瀕海意江梅還白故園情  
循除遠水春前急繞郭空山雪後明  
林影易斜寒日短角聲吹去暮雲平  
最慙佳客忘形契肯伴衰翁著屐行

凝香齋

每覺西齋景最幽不知官是古諸侯  
一尊風月身無事千里耕桑歲有秋  
雲水醒心鳴好鳥玉沙清耳漱寒流

沈烟細細臨黃卷疑在香爐最上頭

次道子中書問歸期

寓食東州歲未暮蓬萊人問幾時歸  
凭闌到處臨清泚  
開閣終朝對翠微  
兩印每閒軍市靜  
雙旌多偃送迎稀  
一枝數粒身安穩  
不羨雲鵬九萬飛

趵突泉

一派遙從玉水分  
暗來都灑歷山塵  
滋榮冬茹溫常蚤  
潤澤春茶味更真  
已覺路傍行似鑑  
最憐沙際涌如輪

層城齊魯封疆會  
況託娥英詫世人

金山寺

塵外峒嵯驚嶺宮  
架虛排險出青紅  
林光巧轉滄波上  
海色遙涵白日東  
夜靜神龍聽呪食  
秋深蒼鶻起搏風  
連荆控蜀長江水  
盡在回廊顧盼中

昇山

脩竹長松十里陰  
任敦燒藥洞門深  
獨窺金版驚人語  
能到青霞出世心  
鷄犬亦隨雲外去  
蓬瀛豈必海中尋

丹樓碧閣唐朝寺鐘唄香花滿舊林

玄沙寺

昇山南下一峯高上盡層軒未覺勞  
際海烟雲常慘淡入冬松竹更蕭騷  
經臺日永銷香篆講席風生落塵毛  
我亦有心從自得琉璃瓶水照秋毫

送鄭州邵資政

江夏無雙譽菑川第一才笑談成黼藻  
咳唾落瓊瑰紫氣鋒鉞露青冥羽翼開  
雋遊追幙府高步集蓬萊探討

篇章洽研磨術業該九霄新漢邸萬目注梁臺選擇真  
儒用招延急詔催衣冠驚用綺賓友重鄒枚每右橫經  
席寧虛置醴杯八荒披日月萬里散雲雷始去東山榜  
俄參北斗魁廟堂竒計得荒服驚心摧帝念人求舊朝  
須汝作梅避榮言屢切請外志難回際海歸謀畧連吳  
入剗裁夕冰承命出畫錦過鄉來許國風猷壯容民宇  
量恢節旄恩換鎮京室地稱陪賜覲親中宸通班接上  
台壺漿空度洧公位在三槐

憶越中梅

浣沙亭北小山梅蘭渚移來手自栽今日舊林冰雪地  
冷香幽艷向誰開

霧松

園林初日靜無風霧松花開處處同記得集英深殿裏  
舞人齊插玉瓏鬆

詠柳

亂條猶未變初黃倚得東風勢便狂解把飛花蒙日月

不知天地有清霜

蘓軾<sub>上</sub>

字子瞻一字和仲眉州眉山人生十年父洵遊學四方母程氏親以書授程讀東漢范滂傳慨然太息軾請曰兒若為滂母耶比冠博通經史屬文日數千言嘉祐二年試禮部主司歐陽修得軾論驚喜欲冠多士疑其客曾鞏所為寘第二殿試乙科以書見修修語梅堯臣曰吾當避此人出一頭地矣丁母憂服闋調福昌主簿用薦試閣復對制策入三等除理評荅判鳳翔府英宗自藩邸素聞其名欲召入翰林知制誥宰相韓琦請緩之試二論復入三等得直史館丁父憂熙寧二年還朝王安石執政素惡其持論異已以軾判官告院神宗召見訪

政令得失軾對以求治太急聽言太廣進人太銳  
神宗慨然安石不悅命權開封府推官軾上書極  
論新法不便安石滋怒喉御史論奏其過窮治無  
所得遂請外通判杭州徙知徐州湖州坐詩語謗  
訕下獄神宗憐之安置黃州上屢欲用軾為宰相  
王珪等所阻移汝州請就食常州哲宗立起知登  
州召為禮部郎中遷起居舍人賜緋遷中書舍人  
尋除翰林學士召對便殿宣仁后諭以優擢出先  
帝意曰先帝每誦卿文章必歎曰奇才奇才但未  
及進用卿耳軾不覺哭失聲宣仁與哲宗亦泣遂  
命坐賜茶撤御前金蓮燭送歸院積以論事為當  
軸者所恨請外出知杭州抗人德之家有畫像欲  
食必祝名為吏部尚書以弟軾除右丞改翰林承  
旨復出知潁州徙揚州未幾以兵部尚書召兼侍讀  
宣仁崩哲宗親政國事浸變以兩學士出知定州  
自是一斥不復起矣紹聖初安置惠州再貶居昌

化藏宗立移廉州改舒州團練副使徙永州更三大赦遷提舉玉局觀卒于常州年六十六贈太師

諡文

忠

### 司馬君實獨樂園

青山在屋上流水在屋下中有五畝園花竹秀而野花  
香襲杖屨竹色侵盃斚樽酒樂餘春碁局消長夏洛陽  
古多士風俗猶爾雅先生卧不出冠蓋傾洛社雖云衆  
與樂中有獨樂者才全德不形所貴知我寡

秋懷

苦熱念西風常恐來無時及茲遂淒凜又作徂年悲蟋蟀鳴我牀黃葉投我幃牕前有棲鵬夜嘯如狐狸露冷梧葉脫孤眠無安枝熠燿亦求偶高屋飛相追定知無幾見迫此清霜期物化逝不留我興為嗟咨便當勤秉燭行樂戒暮遲

湖上夜歸

我飲不盡罷半酣尤味長籃輿湖上歸春風吹面涼行到孤山西夜色已蒼蒼清吟雜夢寐得句旋已忘尚記

金一八八八二  
梨花村依依聞暗香

虎丘

入門無平田石路穿細嶺陰風生澗壑古木翳潭井湛  
盧誰復見秋水光耿耿鐵花秀巖壁殺氣噤蛙黷幽幽  
生公堂左右立頑礦當年或未信異類服精猛胡為百  
歲後仙鬼互馳騁東軒有佳致雲光麗千頃熙熙覽生  
物春意破淒冷我來屬無事霽日相與永喜鵲翻初旦  
愁鶯蹲落景坐見漁樵還新月溪上影悟彼良自吟歸

田行可請

與王郎昆仲及兒子邁遠城觀荷花登岷山亭晚

入飛英寺

二首

清風定何物可愛不可名所至如君子草木有嘉聲我  
行本無事孤舟任斜橫中流自偃仰適與風相迎舉杯  
屬浩渺樂此兩無情歸來蒼雪間雲水夜自明

吏民憐我懶關訟日已稀能為無事飲可作不夜歸復  
尋飛英遊盡此一寸暉撞鐘履聲集顛倒雲山衣我來

無時節杖屨自推扉莫作使君看外似中已非

寒食雨

二首

自我來黃州已過三寒食年年欲惜春去不容惜今年又苦雨兩月秋蕭瑟卧聞海棠花泥汙臘脂雪

春江欲入戶雨勢來不已小屋如漁舟濛濛水雲裏空庖煮寒菜破竈燒溼葦那知是寒食死灰吹不起

別歲

故人適千里臨別尚遲遲人行猶可復歲行那可追問

歲安所之遠在天一涯已逐東流水赴海歸無時東鄰  
酒初熟西舍彘亦肥且為一日歡慰此窮年悲勿嗟舊  
歲別行與新歲辭去去勿回顧還君老與衰

罷徐州往南京馬上走筆寄子由

父老何自來花枝嫋長紅洗琰拜馬前請壽使君公前  
年無使君魚鼈化兒童舉鞭謝父老正坐使君窮窮人  
命分惡所向招灾凶水來非吾過去亦非吾功

東坡

二首并叙

余至黃二年日以困匱故人馬正卿哀予乏食為於  
郡中請故營地數十畝使得躬耕其中地既久荒為  
茨棘瓦礫之場而歲又大旱墾闢之勞筋力殆盡釋  
耒而歎乃作是詩自慰其勤庶幾來歲之入以忘其  
勞焉

荒田雖浪莽高庫各有適下隰種秔秫東原蒔棗栗江  
南有蜀士桑果已許乞好竹不難栽但恐鞭橫逸仍須  
卜佳處規以安我室家童燒枯草走報暗井出一飽耒

敢期瓢飲已可必

潘子久不調沽酒江南村郭生本將種賣藥西市垣古  
生亦好事恐是押牙孫家有十畝竹無時客叩門我窮  
交舊絕三子獨見存從我於東坡勞餉同一餐可憐杜  
拾遺事與朱阮論吾師卜子夏四海皆弟昆

孫莘老寄墨

四首

但徠無老松易水無良工珍材取樂浪妙手惟潘翁魚  
胞熟萬杵犀角盤雙龍墨成不敢用進入蓬萊宮蓬萊

春晝永三殿明房櫳金箋灑飛白瑞霧縈長虹遙憐醉  
常侍一笑開天容

谿石琢馬肝剡藤開玉版噓噓雲霧出奕奕龍蛇縮此  
中有何好秀色紛滿眼故人歸天祿古漆窺蠹簡隄麋  
給尚方老手檀編剡分餘幸見及流落一歎赧

我貧如饑鼠長夜空敲齧瓦池研竈煤葦管書柿葉近  
者唐夫子遠致烏玉玦先生又繼之圭璧爛箱篋晴牕  
洗硯坐蛇蚓稍蟠結便有好事人敲門求醉帖

吾窮本坐詩久服朋友戒五年江湖上閉口洗殘債今  
來復稍稍快癢如爬疥先生不譏訶又復寄詩械幽光  
發竒思點黜出荒怪詩成自一笑故疾逢鰕蟹

僕所藏仇池石希代之寶也王晉卿以小詩借觀  
意在於奪僕不敢不借然以此詩先之

海石來珠宮秀色如蛾綠坡陀尺寸間宛轉陵巒足連  
娟二華頂空洞三節腹初疑仇池化又恐瀛洲蹙慙慙  
嶠南使餽餉淮東牧得之喜無寐與汝交不瀆盛以高

麗盆藉以文登玉幽光先五夜冷氣壓三伏老人生如  
寄衡茅久未卜一夫幸可致千里還相逐風流貴公子  
竄謫武當谷見山應已厭何事奪所欲欲留嗟趙弱寧  
許負秦曲傳觀慎勿許間道歸應速

遷居

有引

吾紹聖元年十月二日至惠州寓合江樓是月十八  
日遷于嘉祐寺二年三月十九日復遷于合江樓三  
年四月二十日復歸于嘉祐寺時方卜築白鶴峯之

上庶幾其少安乎

前年家水東回首夕陽麗去年家水西溼面春雨細東  
西兩無擇緣盡我軌逝今年復東徙舊館聊一憩已買  
白鶴峯規作終老計長江在北戶雪浪舞吾砌青山滿  
牆頭髮鬢幾雲髻雖慙抱朴子金鼎陋蟬蛻猶賢柳柳  
州廟俎薦丹荔吾生本無待俯仰了此世念念自成劫  
塵塵各有際下觀生物息相吹等蚊蚋

聞鄰舍兒誦書欣然而作

幽居亂蛙黷生理半人禽瑟然已可喜況聞弦誦音兒  
聲自圓美誰家兩青衿且欣習齊咻未敢笑越吟九齡  
起韶石姜子家日南吾道無南北安知不生今海闊尚  
挂斗天高欲橫參荆榛短牆缺燈火破屋深引書與相  
和置酒仍獨斟可以侑我醉琅然如玉琴

和陶飲酒

二首

道喪士失已出語輒不情江左風流人醉中亦求名淵  
明獨清真談笑得此生身如受風竹掩冉衆葉驚俯仰

各有態得酒詩自成

蠹蠕食葉蟲仰空慕高飛一朝傳兩翅乃得粘網悲  
啁啾厭巢雀沮澤疑可依赴水生兩殼遭閉何時歸  
二蟲竟誰是一笑百念衰幸此未化間有酒君莫違

和陶止酒

丁丑歲余謫海南子由亦貶雷州五月十一日相遇  
於藤同行至雷六月十一日相別渡海余時病痔呻  
吟子由亦終夕不寐因誦淵明詩勸余止酒乃和元

韻因以贈別庶幾真止矣

觀此序則知子瞻至雷州經過信宿惜別恩恩

曾未飽詣雷俗共居雷雜詠當屬素淮海不應更入蘓詩也

時來與物逝路窮非我止與子各意行同落百蠻裏蕭  
然兩別駕各攜一稚子子室有孟光我室惟法喜相逢  
山谷間一月同卧起茫茫海南北粗亦足生理勸我師  
淵明力薄且為已微疴坐杯勺止酒則瘳矣望道雖未  
濟隱約見津涘從今東坡室不立杜康祀

和陶擬古

三首

有客叩我門繫馬門前柳庭空鳥雀散門閉客立久主人枕書卧夢我平生友忽聞剝啄聲驚散一杯酒倒裳起謝客夢覺兩愧負坐談離今古不答顏愈厚問我何處來我來無何有

客去室幽幽鵬鳥來坐隅引吭伸兩翮太息意不舒吾生如寄耳何者為我廬去此復何之少安與汝居夜中聞長嘯月露荒榛蕪無問亦無答吉凶兩何如

黎山有幽子形槁神獨完負薪入城市笑我儒衣冠生

不聞詩書豈知有孔顏  
脩然獨往來榮辱未易關  
日暮鳥獸散家在孤雲端  
問答了不通歎息指屢彈  
似言君貴人草莽棲龍鸞  
遺我吉貝布海風今歲寒

和鮮于子駿鄆州新堂月夜

明月入華池反照池上堂  
堂中隱凡人心與水月涼  
風螢已無迹露草時有光  
起觀河漢流步履響長廊  
名都信繁會千指調絲簧  
先生病不飲童子為燒香  
獨作五字詩清絕如韋郎  
詩成月漸側皎皎兩相望

屈原塔

楚人悲屈原千歲意未歇精魂飄何處父老空哽咽至  
今滄江上投飯救饑渴遺風成競渡猿叫楚山裂屈原  
古壯士就死意甚烈世俗安得知眷眷不忍決南賓舊  
屬楚山上有遺塔應是奉佛人恐子就淪滅此事雖無  
憑此意固已切古人誰不死何必較考折名聲實無窮  
富貴亦暫熱大夫知此理所以持死節

枸杞

神藥不自閔羅生滿山澤日有牛羊憂歲有野火厄越  
俗不好事過眼等茨棘青莢春自長絳珠爛莫摘短籬  
護新植紫筍生卧節根莖與花實收拾無棄物大將玄  
吾鬢小則餉我客似聞朱明洞中有千歲質靈厖或夜  
吠可見不可索仙人儻許我借仗扶衰疾

讀孟郊詩

愛君銅斗歌鄙俚頗近古桃弓射鴨罷獨速

一作著

短蓑

舞不憂踏船翻踏浪不踏土吳姬霜雪白赤脚浣白紵

嫁與踏浪兒不識離別苦歌君江湖曲感我長羈旅

與客遊道場何山

清溪到山盡飛路盤空小紅亭與白塔隱見喬木杪中  
休得小庵孤絕寄雲表洞庭在北戶雲水天渺渺高堂  
儼像設禪室各深窈奔泉何處來華屋過溪沼何山隔  
幽谷去路清且悄長松度翠蔓絕壁挂啼鳥我友自杭  
來尚歎所歷少明朝已陳迹清景墮空杳

寄鄧道士

并引

羅浮山有野人相傳葛稚川之隸也鄧道士守安山  
中有道者也嘗於庵前見其足迹長二尺許紹聖二  
年正月十日予偶讀韋蘓州寄金椒山中道士詩依  
韻寄之

一杯羅浮春遠餉採薇客遙知獨酌罷醉卧松下石幽  
人不可見清嘯聞月夕聊戲菴中人空飛本無迹

焦千之求惠山泉詩

茲山定空中乳水滿其腹遇隙則發見臭味實一族淺

深各有值方圓隨所蓄或為雲洶涌或作綫斷續或鳴  
空洞中雜佩間琴筑或流蒼石縫宛轉龍鸞蹙餅罷走  
四海真偽半相瀆貴人高宴罷醉眼亂紅綠赤泥開方  
印紫餅截圓玉傾甌共歡賞竊語笑僮僕豈如泉上僧  
盥灑自挹掬故人憐我病弱籠寄新馥欠伸北牕下晝  
睡美方熟精品厭凡泉願子致一斛

書鄆陵王主簿所畫折枝

論畫以形似見與兒童鄰賦詩必此詩定非知詩人詩

畫本一律天工與清新邊鸞雀寫生趙昌花傳神何如  
此兩幅疎淡含精勻誰言一點紅解寄無邊春

書韓幹牧馬圖

南山下汧渭間想見開元天寶年八坊分屯隘秦川四  
十萬匹如雲烟駉駉駟駘騊駼驪白魚赤兔驛皇驪龍  
顧鳳頸獐且妍竒姿逸德隱駕頑碧眼波斯手足鮮歲  
時剪刷供帝閑拓袍臨池侍三千紅妝照日光流淵樓  
下玉螭吐清寒往來感踏生飛湍衆工舐筆和朱鉛先

生曹霸弟子韓廐馬多肉尻雕圓肉中畫骨誇猶難金  
羈玉勒繡羅鞍鞭箠刻烙傷天全不如此圖近自然平  
沙細草荒芊綿驚鴻脫兔爭後先王良挾策飛上天何  
必俯首服短轡

中秋見月寄子由

西風吹暑天益高明月耿耿分秋毫彭城閉門青嶂合  
坐聽百步飛鳴濤使君攜客登燕子月色著人如著水  
筵前不設鼓與鐘處處笛聲相應起浮雲卷盡流金九

戲馬臺西山鬱蟠杯中淥酒一時盡衣上白露三更寒  
荔枝歎

十里一置飛塵灰五里一堠兵火催顛坑仆谷相枕藉  
知是荔枝千騎來飛車跨山鵲橫海風枝露葉如新採  
宮中美人一破顏驚塵濺血流千載永元荔枝來交州  
天寶歲貢取之涪至今欲食林甫肉無人舉觴酬伯游  
我願天公憐赤子莫生尤物為瘡痂君不見武夷溪邊  
金粟芽前丁後蔡相籠加爭新買籠各出意今年鬪品

充官荼吾君所乏豈此物致養口體何陋耶洛陽相君  
忠孝家可憐亦進姚黃花

別子由

先君昔愛洛陽居我今亦過嵩山麓水南卜宅吾豈敢  
試向伊川買脩竹又聞緱山好泉眼傍市穿林瀉冰玉  
遙想茅軒照水開兩翁相對清如鵠

泗州僧伽塔

我昔南行舟繫汴逆風三日沙吹面舟人共勸禱靈塔

香火未收旗脚轉回頭頃刻失長橋却到龜山未朝飯  
至人無心何厚薄我自懷私欣所便耕田欲雨刈欲晴  
去得順風來者怨若使人人禱輒遂造物應須日千變  
我今身世兩悠悠去無所逐來無戀得行固願留不惡  
每到有求神亦倦退之舊云三百尺澄觀所營今已換  
不嫌俗士汙丹梯一看雲山遠淮甸

遊金山寺

我家江水初發源宦遊直送江入海聞道潮頭一丈高

天寒尚有沙痕在中冷南畔石盤陀古來出沒隨濤波  
試登絕頂望鄉國江南江北青山多羈愁畏晚尋歸楫  
山僧苦留看落日微風萬頃靴文細斷霞半空魚尾赤  
是時江月初生魄二更月落天深黑江心似有炬火明  
飛焰照山棲鳥驚悵然歸卧心莫識非鬼非人竟何物  
江山如此不歸山江神見怪驚我頑我謝江神豈得已  
有田不歸如江水

孫莘老求墨妙亭詩

蘭亭繭紙入昭陵世間遺跡猶龍騰顏公變法出新意  
細筋入骨如秋鷹徐家父子亦秀絕字外出力中藏稜  
嶧山傳刻典刑在千載筆法留陽冰杜陵評書貴瘦硬  
此論未公吾不憑短長肥瘠各有態玉環飛燕誰敢憎  
吳興太守真好古購買斷缺揮縑繒龜趺入坐螭隱壁  
空齋晝靜聞登登竒蹤散出走吳越勝事傳說誇友朋  
書來乞詩要自寫為把栗尾書谿藤後來視今猶視昔  
過眼百世如風燈他年劉郎憶賀監還道同時須伏膺

將之湖州戲贈莘老

餘杭自是山水窟側聞吳興更清絕湖中橘林新著霜  
溪上茗花正浮雪顧渚茶芽白於齒梅溪木瓜紅勝頰  
吳兒鱸縷薄欲飛來去先說饒涎垂亦知謝公到郡久  
應怪杜牧尋春遲鬢絲只好對禪榻湖亭不用張水嬉  
續麗人行

李仲謀家有周昉畫背面欠仲內人極精戲作此詩  
深宮無人春日長沈香亭北百花香美人睡起薄梳洗

燕舞鶯啼空斷腸  
畫工欲畫無窮意  
背立東風初破睡  
若教回首却嫣然  
陽城下蔡俱風靡  
杜陵饑客眼長寒  
寒驢破帽隨金鞍  
隔花臨水時一見  
只許腰支背後看  
心醉歸來茆屋底  
方信人間有西子  
君不見孟光舉案  
與眉齊何曾背面傷春啼

攜妓樂遊張山人園

大杏金黃小麥熟  
墮巢乳鵲拳新竹  
故將俗物惱幽人  
細馬紅妝滿山谷  
提壺勸酒意雖重  
杜鵑催歸聲更速

酒闌人散却闌門寂歷斜陽挂疎木

九日黃樓作

去年重陽不可說南城夜半千漚發水穿城下作雷鳴  
泥滿城頭飛雨滑黃花白酒無人問日暮歸來洗鞵襪  
豈知還復有今年把琰對花容一呷莫嫌酒薄紅粉陋  
終勝泥中事鋏鉞黃樓新成壁未乾清河已落霜初殺  
朝來白露如細雨南山不見千尋刹樓前便作海茫茫  
樓下空聞櫓鵝軋薄寒中人老可畏熱酒澆腸氣先壓

烟消日出見漁村遠水鱗鱗山磬磬詩人猛士雜龍虎  
楚舞吳歌亂鵝鴨一杯相屬君勿辭此境何殊泛清雪

定惠院寓居月夜偶出

幽人無事不出門偶逐東風轉良夜參差玉宇飛木末  
繚繞香烟來月下江雲有態清自媚竹露無聲浩如瀉  
已驚弱柳萬絲垂尚有殘梅一枝亞清詩獨吟還自和  
白酒已盡誰能借不辭青春忽忽過但恐懽意年年謝  
自知醉耳愛松風會揀霜林結茅舍浮浮大甌長炊玉

溜溜小槽如壓蔗飲中真味老更濃醉裏狂言醒可怕  
但當謝客對妻子倒冠落佩從嘲罵

院東雜花滿山有海棠一株土人不知貴也

江城地瘴蕃草木只有名花苦幽獨嫣然一笑竹籬間  
桃李漫山總麤俗也知造物有深意故遣佳人在空谷  
自然富貴出天姿不待金盤薦華屋朱唇得酒暈生臉  
翠袖卷紗紅映肉林深露暗曉光遲日暖風輕春睡足  
雨中有淚亦悽愴月下無人更清淑先生食飽無一事

散步逍遙自捫腹不問人家與僧舍拄杖敲門看脩竹  
忽逢絕艷照衰朽歎息無言揩病目陋邦何處得此花  
無乃好事移西蜀寸根千里不易到銜子飛來定鴻鵠  
天涯流落俱可念為飲一樽歌此曲明朝酒醒還獨來  
雪落紛紛那忍觸

和秦太虛梅花

西湖處士骨應槁只有此詩君壓倒東坡先生心已灰  
為愛君詩被花惱多情立馬待黃昏殘雪消遲月出蚤

江頭千樹春欲闌竹外一枝斜更好孤山山下醉眠處  
點綴裙腰紛不掃萬里春隨逐客來十年花送佳人老  
去年花開我已病今年對花還草草不如風雨卷春歸  
收拾餘香還畀昊

豆粥

君不見滹沱流澌車折軸公孫倉皇奉豆粥溼薪破竈  
自燎衣饑寒頓解劉丈叔又不見金谷敲冰草木春帳  
下烹煎皆美人萍蘆豆粥不傳法咄嗟而辦石季倫干

戈未解身如寄聲色相纏心已醉身心顛倒自不知更  
識人間有真味豈如江頭千頃雪色蘆茅簷出沒晨烟  
孤地碓舂粳光似玉沙餅煮豆軟如酥我老此身無著  
處賣書來問東家住卧聽鷄鳴粥熟時蓬頭曳履君家  
去

送戴蒙赴成都玉局觀將老馬

拾遺被酒行歌處野梅官柳西郊路聞道華陽版籍中  
至今尚有城南杜我欲歸尋萬里橋水花風葉暮蕭蕭

芋魁徑尺誰能盡  
檜木三年已足燒  
百歲風狂定何有  
羨君今作峨眉叟  
縱未家生執戟郎  
也應世出埋輪守  
莫欺老病未歸身  
玉局他年第幾人  
會待子猷清興發  
還須雪夜去尋君

秧馬歌

并引

過廬陵見宣德郎致仕曾君安止所出作禾譜文既  
溫雅事亦詳實惜其有所缺不譜農器也予昔遊武  
昌見農夫皆騎秧馬以榆棗為腹欲其滑以楸桐為

背欲其輕腹如小舟昂其首尾背如覆瓦以便兩髀  
雀躍于泥中繫束藁其首以縛秧日行千畦較之偃  
僂而作者勞佚相絕矣史記禹乘四載泥行乘橈解  
者曰橈形如箕摘行泥上豈秧馬之類乎作秧馬歌  
一首附于禾譜之末云

春雲濛濛雨淒淒春秧欲老翠剡齊嗟我婦子行水泥  
朝分一壠暮千畦腰如塋篲首啄鷄筋煩骨殆聲酸嘶  
我有桐馬手自提頭尻軒昂腹脇低背如覆瓦去角圭

以我兩足為四蹄聳踊滑汰如鳧鷖纖纖束葉亦可齎  
何用繁纓與月題竭從畦東走畦西山城欲閉聞鼓鼙  
忽作的盧躍檀溪歸來挂壁從高棲了無芻秣饑不啼  
少壯騎汝逮老鰥何曾蹶軼防顛擠錦韉公子朝金閨  
笑我一生蹋牛犁不知自有木馱馱

四月十一日初食荔枝

南村諸楊北村盧

謂楊梅  
盧橘

白花青葉冬不枯垂黃綴紫

烟雨裏特與荔枝為先驅海山仙人絳羅襦紅紗中單

白玉膚不須更待妃子笑風骨自是傾城姝不知天工  
有意無遣此尤物生海隅雲山得伴松檜老霜雪自困  
楂梨麤先生洗琰酌桂醕冰盤薦此頰虬珠似開江鱉  
斫玉柱更洗河豚烹腹腴我生涉世本為口一官久已  
輕尊鱸人間何者非夢幻南來萬里真良圖

過於海舶得邁寄書酒作詩遠和之皆粲然可觀  
子由有書相慶也因用其韻賦一篇并寄諸子

姪

我似老牛鞭不動雨滑泥深四蹄重汝如黃犢走却來  
海闊山高百程送庶幾門戶有八慈不恨居鄰無二仲  
他年汝曹笏滿牀中夜起舞踏破甕會當洗眼看騰躍  
莫指癡腹笑空洞譽兒雖是兩翁癖積德已自三世種  
豈惟萬一許生還尚恐九十煩珍從六子晨耕簞瓢出  
衆婦夜績燈火共春秋古史乃家法詩筆離騷亦時用  
但令文字還照世糞土腐餘安足夢

渚宮

渚宮寂寞依古郢楚地荒茫非故基二王臺閣已鹵莽  
何況遠聞縱橫時楚王獵罷擊靈鼓猛士操舟張水嬉  
釣魚不復數魚鼈大鼎千石烹蛟螭當時郢人架宮殿  
意思絕妙般與倕飛樓百尺照湖水上有燕趙千娥眉  
臨風揚揚意自得長使宋玉作楚詞秦兵西來取鐘簴  
故宮禾黍秋離離千年壯觀不可復今之存者蓋已卑  
池空野迴樓閣小惟有深竹藏狐狸臺中絳帳誰復見  
臺下野水浮清漪綠牕朱戶春晝閑想見深屋彈朱絲

腐儒亦解愛聲色何用白首談孔姬沙泉半涸草堂在  
破牕無紙風颼颼陳公蹤跡最未遠七瑞寥落今何之  
百年人事知幾變直恐荒廢成空陂誰能為我訪遺迹  
草中應有湘東碑

送將官梁左藏赴莫州

燕南垂趙北際其間不合大如礪至今父老哀公孫蒸  
土為城鐵作門城中積穀三百萬猛士如雲驕不戰一  
朝鼓角鳴地中帳下美人空掩面豈如千騎平時來笑

談磬欵生風雷葛巾羽扇紅塵靜投壺雅歌清燕開東  
方健兒虢虎樣泣涕懷思廉頗將彭城老守亦淒然不  
見君家雪兒唱

贈寫御容妙善師

憶昔射策干先皇珠簾翠幄分兩廂紫衣中使下傳詔  
跪捧再拜聞天香仰觀絃冕目生暈但見曉色開扶桑  
迎陽晚出步就坐絳紗玉斧光照廊野人不識日月角  
彷彿尚記重瞳光三年歸來真一夢橋山松檜淒風霜

天容玉色誰敢畫老師古寺晝閉房夢中神授心有得  
覺來信手筆已忘幅巾常服儼不動孤臣入門涕自滂  
元老俯坐鬚眉古虎臣立侍冠劍長平生慣寫龍鳳質  
肯顧草間猿與麀都人踏破鐵門限黃金白壁空堆牀  
雨來摹寫亦到我謂是先帝白髮郎不須覽鏡坐自了  
明年乞身歸故鄉

送王伯敷守號

華山東麓秦遺民當時依山來避秦至今風俗含古意

柔桑淶水招行人行人掉臂不回首爭入嶠函土囊口  
惟有使君千里來欲飲三堂無事酒三堂本來一事無  
日長睡起聞投壺牀頭硯石開雲月澗底松根斲雪腴  
山棚盜散人安寢勸買耕牛發陳廩歸來只作水衡卿  
我欲攜壺就君飲

安國寺尋春

卧聞百舌呼春風起尋花柳村村同城南古寺脩竹合  
小房曲檻歌深紅看花歎老憶年少對酒思家愁老翁

病眼不羞雲母亂鬢絲強理茶烟中遙知二月王城  
外玉仙洪福花如海薄羅勻霧蓋新妝快馬爭風鳴雜  
佩玉川先生真可憐一生耽酒終無錢病過春風九十  
日獨抱漆丁看花發

舟中夜起

微風蕭蕭吹菰蒲開門看雨月滿湖舟人水鳥兩同夢  
大魚驚竄如奔狐夜深人物不相管我獨形影相嬉娛  
暗潮生渚弔寒蛸落月挂柳看縣蛛此生忽忽憂患裏

清境過眼能須臾  
鷄鳴鐘動百鳥散  
船頭擊鼓還相呼  
號國夫人夜遊圖

佳人自鞚玉花驄  
翩如驚燕踏飛龍  
金鞭爭道寶釵落  
何人先入明光宮  
宮中羯鼓催花柳  
玉奴絃索花奴手  
坐中八姨真貴人  
走馬來看不動塵  
明眸皓齒復誰見  
只有丹青餘淚痕  
人間俯仰成今古  
吳公臺下雷塘路  
當時一笑潘麗華  
不知門外韓擒虎

十一月二十六日松風亭下梅花盛開

春風嶺上淮南村昔年梅花曾斷魂  
豈知流落復相見  
蠻風蜚雨愁黃昏  
長條半落荔枝浦  
卧樹獨秀桄榔園  
豈惟幽光留夜色  
直恐冷艷排冬溫  
松風亭下荆棘裏  
兩株玉蘂明朝暎  
海南仙雲嬌墮砌  
月下綈衣來扣門  
酒醒夢覺起繞樹  
妙意有在終無言  
先生獨飲勿歎息  
幸有落月窺清樽

郭祥正家醉畫竹石壁上郭作詩為謝且遺古銅劍二

空腸得酒芒角出肝肺槎牙生竹石森然欲作不可回  
吐向君家雪色壁平生好詩仍好畫書牆浣壁長遭罵  
不嗔不罵喜有餘世間誰復如君者一雙銅劍秋水光  
兩首新詩爭劍鉞劍在牀頭詩在手不知誰作蛟龍吼

送晁美叔

我年二十無朋儔當時四海一子由君來扣門如有求  
頽然病鶴清而脩醉翁遣我從子游翁如退之蹈軻丘  
尚欲放予出一頭

嘉祐初軾與子由寓興國浴室美叔  
忽見訪云君從歐陽公遊久矣公令

我來與子定交謂子必名世  
老夫亦須放他出一頭地  
酒醒夢斷四十秋病鶴不

病骨愈虯惟有我顏老可羞  
醉翁賓客散九州幾人白  
髮還相收我如懷祖拙自謀  
正作尚書已過優君求會  
稽寔良籌往看萬壑爭交流

君近乞  
越州

宋元詩會卷二十

欽定四庫全書

宋元詩會卷二十一

兵部主事陳焯編

蘇軾<sub>下</sub>

訪張山人

萬木鎖雲龍天留與戴公路迷山向背人在灤西東  
薺麥餘春雪櫻桃落晚風入城都不記歸路醉眠中

過淮贈景山兼寄子由

過淮山漸好松檜亦蒼然  
藹藹藏孤寺泠泠出細泉  
故人真吏隱小檻倚巖偏  
却望臨江市東風語笑傳

新年

三首

曉雨暗人日春愁連上元  
水生挑菜渚烟濕落梅村  
小市人歸盡孤舟鶴跼翻  
猶堪慰寂寞漁火亂黃昏

海國空自暖春山無限青  
冰花結瘴雨雪茵到江城  
更待輕雷發先催凍筍生  
豐湖有藤菜似可敵蓴羹

荔子幾時熟花頭今已繁  
探春先揀樹買夏欲論園  
居

士常攜客參軍許扣門明年更有味懷抱帶諸孫

北寺

即仙游潭

唐初傳有此亂後不留碑畏虎闔門蚤無村得米遲山  
泉自入甕野桂不勝炊信美那能久應先學忍饑

子由綠筠堂

愛竹能延客求詩剗挂牆風梢千纛亂月影萬夫長谷  
鳥驚碁響山蜂識酒香只應陶靖節會聽北牕涼

遊鶴林招隱

郊原雨初霽春物有餘妍古寺滿脩竹深林聞杜鵑睡  
餘柳花墮目眩山櫻然西牕有病客危坐看香烟

乘舟過賈收水閣收不在見其子

愛酒陶元亮能詩張志和青山來水檻白雨滿漁蓑淚  
垢添丁面貧低舉案蛾不知何所樂竟夕獨酣歌

荊州 三首

遊人出三峽楚地盡平川北客隨南賈吳檣間蜀船江  
侵平野斷風捲白沙旋欲問興亡意重城自古堅

南方舊戰國慘澹意猶存慷慨因劉表淒涼為屈原廢  
城猶帶井古姓聚成村亦解觀形勝昇平不敢論  
朱檻城東角高王此望沙江山非一國烽火畏三巴戰  
骨淪秋草危樓倚斷霞百年豪傑盡擾擾見魚鰕

南康望湖亭

八月渡長湖蕭條萬象疎秋風片帆急暮雨一山孤許  
國心猶在康時術已虛岷峨家萬里投老得歸無

中隱堂詩

并序

岐山宰王君紳其祖故蜀人也避亂來長安而遂家  
焉其居第園圃有名長安城中號中隱堂者是也予  
之長安王君以書戒其子弟邀予遊且乞詩因賦此  
二月驚梅晚幽香此地無依依慰遠客皎皎似吳姝不  
恨故園隔空嗟芳歲徂春深桃李亂笑汝益羈孤

雨晴後野步

雨過浮萍合蛙聲滿四鄰海棠真一夢梅子欲嘗新柱  
杖閒挑菜鞦韆不見人慙慙木芍藥獨自殿餘春

倦夜

倦枕厭長夜小牕終未明孤村一犬吠殘月幾人行衰  
鬢久已白旅懷空自清荒園有絡緯虛織竟何成

宋復古畫瀟湘晚景圖

西征憶南國堂上畫瀟湘照眼雲山出浮空野水長舊  
遊心自省信手筆都忘曾有衡陽客來看意渺茫

去歲與子野遊逍遙堂日欲沒因往西山叩羅浮  
道院至已二鼓矣遂宿於西堂今歲索居僦耳

子野復來相見作詩贈之

往歲追歡地寒牕夢不成  
笑談驚半夜風雨暗長檠  
鷄唱山椒曉鐘鳴霜外聲  
只今那復見彷彿似三生

大老寺竹間閣子

殘花帶葉暗新筍出林香  
但見竹陰綠不知汧水黃  
樹高傾隴鳥池浚落河魴  
栽植良辛苦孤僧瘦欲尫

風水洞和李節推

風轉鳴空穴泉幽瀉石門  
虛心聞地籟妄意覓桃源  
過

客詩難好居僧語不繁歸併得冰雪清冷慰文園

與述古自有美堂乘月夜歸

娟娟雲月稍侵軒  
潋潋星河半隱山  
魚鱗未收清夜永  
鳳簫猶在翠微間  
淒風瑟縮經絃柱  
香霧淒迷著髻鬟  
共喜使君能鼓樂  
萬人爭看火城還

次韻周長官壽星院同餞魯少卿

琉璃百頃水仙家  
風靜湖平響釣車  
寂歷疎松歎晚照  
伶俜寒蝶抱秋花  
困眠不覺依蒲褐  
歸路相將踏桂花

更著綸巾披鶴氅他年應作畫圖誇

十月十五日觀月黃樓席上次韻

中秋天氣未應殊不用紅紗照坐隅山下白雲橫匹素  
水中明月卧浮圖未成短櫂還三峽已約輕舟泛五湖  
為問登臨好風景明年相憶使君無

定州次韻曾仲錫元日見寄

蕭索東風兩鬢華年年幡勝剪宮花愁聞塞曲吹蘆管  
喜見春盤得蓼芽吾國舊供雲澤米君家新致雪坑茶

燕南異事真堪記三寸黃柑擘永嘉

七月二十四日以久不雨出禱礮溪是日宿號縣  
二十五日晚自號縣渡渭宿於僧舍曾閣閣故  
曾氏所建也夜久不寐見壁上前縣令趙薦留  
名有懷其人

龕燈明滅欲三更欹枕無人夢自驚深谷留風終夜響  
亂山銜月半牀明故人漸遠無消息古寺空來有姓名  
欲向礮溪問姜叟僕夫屢報斗杓傾

和柳子玉過陳絕糧

如我自觀猶可厭  
非君誰復肯相尋  
圖書跌宕悲年老  
燈火青熒語夜深  
蚤歲便懷齊物意  
微官敢有濟時心  
南行千里成何事  
一聽秋濤萬鼓音

宿水陸寺寄北山清順僧

二首

草沒河堤雨暗村  
寺藏脩竹不知門  
拾薪煮藥憐僧病  
掃地燒香淨客魂  
農事未休侵小雪  
佛燈初上報黃昏  
年來漸識幽居味  
思與高人對榻論

長嫌鐘鼓聒湖山此境蕭條却自然乞食遶村真為飽  
無言對客本非禪披榛覓路衝泥入洗足闌門聽雨眠  
遙想後身窮賈島夜寒應聳作詩肩

宋叔達家聽琵琶

數絃已品龍香撥半面猶遮鳳尾槽新曲翻從玉連瑣  
舊聲終愛鬱輪袍夢回只記歸舟字賦罷雙垂紫錦絛  
何異烏孫送公主碧天無際鴈行高

有以官法酒見餉者因用前韻求述古為移廚飲

湖上

喜逢門外白衣人，欲膾湖中赤玉鱗。  
遊舫已妝吳榜穩，舞衫初試越羅新。  
欲將魚釣追黃帽，未要靴刀抹絳巾。  
芳意十分強半在，爲君先踏水邊春。

新城道中

東風知我欲山行，吹斷簷間積雨聲。  
嶺上晴雲披絮帽，樹頭初日挂銅鉦。  
野桃含笑竹籬短，溪柳自搖沙水清。  
西崦人家應最樂，煮芹燒筍餉春耕。

會客有美堂周

邵

長官與數僧同泛湖往北山湖

中間堂上歌笑聲以詩見寄因和

載酒無人過子雲掩闕晝卧客書裙歌喉不共聽珠貫  
醉面何因作纈紋僧侶且陪香火社詩壇欲斂鸛鵝軍  
憑君徧遶湖邊寺漲渌晴來已十分

病中遊祖塔院

紫李黃瓜村路香烏紗白葛道衣涼閉門野寺松陰轉  
歌枕風軒客夢長因病得閒殊不惡安心是藥更無方

道人不惜堦前水借與匏樽自在嘗

初自徑山歸述古召飲介亭以病先起

西風初作十分涼喜見新橙透甲香  
遲暮賞心驚節物登臨病眼怯秋光  
慣眠處士雲庵裏倦醉佳人錦瑟旁  
猶有夢迴清興在卧聞歸路樂聲長

次韻述古過周長官夜飲

二更鐃鼓動諸鄰百首新詩間八珍  
已遣亂蛙成兩部更邀明月作三人  
雲烟湖寺家家鏡燈火沙河夜夜春

曷不勸公勤秉燭老來光景似奔輪

過永樂文長老已卒

初驚鶴瘦不可識旋覺雲歸無處尋  
三過門間老病死一彈指頃去來今  
存亡慣見渾無淚鄉井難忘尚有  
心欲向錢塘訪圓澤葛洪川畔待秋深

雪夜書北臺壁

二首

黃昏猶作雨纖纖夜靜無風勢轉嚴  
但覺衾裯如潑水不知庭院已堆鹽  
五更曉色來書幌半夜寒聲落畫簷

試掃北臺看馬耳未隨埋沒有雙尖

城頭初日始翻鴉陌上晴泥已沒車凍合玉樓寒起粟  
光搖銀海眩生花遺蝗入地應千尺宿麥連雲有幾家  
老病自嗟詩力退空吟冰柱憶劉義

夜飲次韻畢推官

簿書叢裏過春風酒聖時時且復中紅燭照庭嘶騷裏  
黃鷄催曉唱玲瓏老來漸減金釵興醉後空驚玉筍工  
月末上時應蚤散免教壑谷問吾公

與參寥師行園中得黃耳蕈

遣化何時取衆香  
法筵齋鉢久淒涼  
寒蔬病甲誰能採  
落葉空畦半已荒  
老楮忽生黃耳菌  
故人兼致白牙薑  
蕭然放筯東南去  
又入春山筍蕨鄉

岐亭道上見梅花戲贈季常

蕙死蘭枯菊亦摧  
返魂香入嶺頭梅  
數枝殘綠風吹盡  
一點芳心雀啁開  
野店初嘗竹葉酒  
江雲欲落豆稽灰  
行當更向釵頭見  
病起烏雲正作堆

二月三日點燈會客

江上東風浪接天，苦寒無賴破春妍。  
試開雲夢羔兒酒，快瀉錢塘藥玉船。  
蠶市光陰非故國，馬行燈火記當年。  
冷烟溼雪梅花在，留得新春作上元。

泗州南山監倉蕭東軒

北望飛塵苦晝霾，洗心聊復寄東齋。  
珍禽聲好猶思越，野橘香清未過淮。  
有信微泉來遠嶺，無心明月轉空階。  
一官倉庾真堪老，坐看松根絡斷崖。

泗州除夜雪中黃師是送酥酒

暮雪紛紛投碎米  
春流咽咽走黃沙  
舊遊似夢徒能說  
逐客如僧豈有家  
冷硯欲書先自凍  
孤燈何事獨成花  
使君半夜分酥酒  
驚起妻孥一笑譁

杜介送魚

新年已賜黃封酒  
舊老仍分頰尾魚  
陋巷關門負朝日  
小園除雪得春蔬  
病妻起斫銀絲膾  
稚子謹尋尺素書  
醉眼矇矓覓歸路  
松江烟雨晚疎疎

舟行至清遠縣見顧秀才極談惠州風物之美

到處聚觀香案吏此邦宜著玉堂仙  
江雲漠漠桂花溼海雨條條荔子然  
聞道黃柑常抵鵲不容朱橘更論錢  
恰從神武來弘景便向羅浮見稚川

新釀桂酒

擣香篩辣入瓶盆盎盎春溪帶雨渾  
收拾小山藏社甕招呼明月到芳樽  
酒材已遣門生致菜把仍叨地主恩  
爛煮葵羹斟桂醕風流可惜在蠻村

正月二十六日偶與數客野步嘉祐僧舍東南野  
人家雜花盛開扣門求觀主人林氏媪出應白  
髮青裙少寡獨居三十年矣感歎之餘作詩記  
之

縹帶細枝出絳房綠陰青子送春忙涓涓泣露紫含笑  
焰焰燒空紅拂桑落日孤烟知客恨短籬破屋為誰香  
主人白髮青裙袂子美詩中黃四娘

連雨江漲

越井岡頭雲出山，牂牁江上水如天。  
牀牀避漏幽人屋，浦浦移家蜨子船。  
龍卷魚鰕并雨落，人隨鷄犬上牆眠。  
祇應樓下平階水，長記先生過嶺年。

白鶴峯新居欲成夜過西鄰翟秀才

林行婆家初閉戶，翟夫子舍尚留關。  
連娟缺月黃昏後，縹緲新居紫翠間。  
繫悶豈無羅帶水，割愁還有劍鉞山。  
中原北望無歸日，鄰火村春自往還。

庚辰歲人日作時聞黃河已復北流老臣舊數論

此今斯言乃驗

二首

老去仍棲隔海村夢中時見作詩孫天涯已慣逢人日  
歸路猶欣過鬼門三策已應思賈讓孤忠終未赦虞翻  
典衣剗買河源米屈指新筭作上元

不用長愁挂月村檳榔生子竹生孫新巢語燕還窺硯  
舊雨來人不到門春水蘆根看鶴立夕陽楓葉見鴉翻  
此生念念隨泡影莫認家山作本元

六月二十日夜渡海

參橫斗轉欲三更苦雨終風也解晴雲散月明誰點綴  
天容海色本澄清空餘魯叟乘桴意粗識軒轅奏樂聲  
九死南荒吾不恨茲遊奇絕冠平生

過嶺

暫著南冠不到頭却隨北鴈與歸休平生不作兔三窟  
今古何殊貉一丘當日無人送臨賀至今有廟祀潮州  
劍關西望七千里乘興真為玉局遊

留題顯聖寺

渺渺疎林集晚鴉孤村烟火梵王家幽人自種千頭橘  
遠客來尋百結花浮石已乾霜後水焦坑間試雨前茶  
祇疑歸夢西南去翠竹江村繚白沙

西蜀楊耆二十年前見之甚貧今見之亦貧所異  
於昔者蒼顏華髮耳女無美惡富者妍士無賢  
不肖貧者鄙使其逢時遇合豈減當世之士哉  
頃宿長安驛舍聞泣者甚怨問之乃昔富而今  
貧者為作一詩今以贈楊君

孤村漸雨逐秋涼，逆旅愁人怨夜長。  
不寐相看唯握馬，愁吟互答有寒釐。  
天寒滯穗猶橫畝，歲晚空機尚倚牆。  
勸爾一杯聊復睡，人間貧富海茫茫。

獄中寄子由

栢臺霜氣夜淒淒，風動琅璫月向低。  
夢遶雲山心似鹿，魂飛湯火命如鷄。  
眼中犀角真吾子，身後牛衣愧老妻。  
百歲神遊定何處，桐鄉知在浙江西。

出獄次前韻

平生文字為吾累，此去聲名不厭低。  
塞上縱歸他日馬，城中不鬪少年鷄。  
休官彭澤貧無酒，隱几維摩病有妻。  
堪笑睢陽老從事，為余投檄向江西。

次韻完夫再贈之什，某已卜居毗陵，與完夫有廬里之約云。

柳絮飛時筍籜斑，風流二老對開關。  
雪芽我為求陽羨，乳水君應餉惠山。  
竹簟水風眠晝永，玉堂制草落人間。  
應容緩急煩閭里，桑柘聊同十畝閒。

贈王子直秀才

萬里雲山一破裘，杖端閒挂百錢遊。  
五車書已留兒讀，二頃田應為鶴謀。  
水底笙歌蛙兩部，山中奴婢橘千頭。  
幅巾我欲相隨去，海上何人識故侯。

贈清涼寺和長老

代北初辭沒馬塵，江南來見卧雲人。  
問禪不契前三語，施佛空留丈六身。  
老去山林徒夢想，雨餘鐘鼓更清新。  
會須一洗黃茅瘴，未用深藏白氎巾。

寄呂穆仲寺丞

孤山寺下水侵門每到先看醉墨痕  
楚相未亡談笑是  
中郎不見典刑存  
君先去踏塵埃  
陌我亦來尋桑棗村  
回首西湖真一夢  
灰心霜鬢更休論

九月二十日微雪懷子由弟

岐陽九月天微雪已作蕭條歲暮心  
短日送寒砧杵急  
冷官無事屋廬深  
愁腸別後能消酒  
白髮秋來已上簪  
近買貂裘堪出塞  
忽思乘傳問西琛

送穆越州

江海相忘十五年，羨君松柏蔚蒼顏。  
四朝耆舊冰霜後，兩郡風流水石間。  
舊政猶傳蜀父老，先聲已振越溪山。  
樽前俱是蓬萊守，莫放高樓雪月閒。

正月二十日往岐亭郡人潘古郭三人送余於女  
王城東禪莊院

十日春寒不出門，不知江柳已搖村。  
稍聞決決流冰谷，盡放青青沒燒痕。  
數畝荒園留我住，半瓶濁酒待君溫。

去年今日關山路細雨梅花正斷魂

第五橋

白露淒風洗瘴烟夢回相對兩淒然  
雀羅廷尉非當日  
鳩杖先生愈少年  
世事飽諳思縮手  
主恩未報恥歸田  
誰憐第五橋東水  
獨照台州老鄭虔

樓觀

鳥噪猿呼晝閉門寂寥誰識古皇尊  
青牛久已辭轅軻  
白鶴時來訪子孫  
山近朔風吹積雪  
天寒落日淡孤村

道人應怪遊人衆，汲盡堦前井水渾。

過嶺寄子由

七年來往我何堪，又試曹溪一勺甘。  
夢裏似曾遭海外，醉中不覺到江南。  
波生濯足鳴空澗，霧遠征衣滴翠嵐。  
誰遣山鷄忽驚起，半巖花雨落毵毵。

歇白塔鋪

甘山廬阜鬱長望，林隙依稀漏日光。  
吳國晚蠶初斷葉，占城蚤稻欲移秧。  
迢迢澗水隨人急，冉冉巖花撲馬香。

望眼儘從飛鳥遠白雲深處是吾鄉

李鈴轄坐上分題戴花

二八佳人細馬馳十千美酒渭城歌  
簾前柳絮驚春曉  
頭上花枝奈老何  
露濕醉巾香掩冉  
月明歸路影婆娑  
綠珠吹笛何時見  
欲把斜紅挿早羅

玉盤盂

并序

東武舊俗每歲四月大會于南禪資福兩寺以芍藥  
供佛而今歲最盛凡七千餘朶皆重跗累萼繁麗豐

碩中有白花正圓如覆盂其下十餘葉稍大承之如  
盤姿格絕異獨出於七千朶之上云得之城北蘇氏  
園中周宰相莒公之別業也而其名俚甚乃為易之  
雜花狼籍占春餘芍藥開時掃地無兩寺妝成寶瓔珞  
一枝爭看玉盤盂佳名會作新翻曲絕品難尋舊畫圖  
從此定知年穀熟姑山親見雪肌膚

壺中九華詩

我家岷蜀最高峯夢裏猶驚翠掃空五嶺莫愁千嶂外

九華今在一壺中天池水落層層見玉女聰明處處通  
念我仇池太孤絕百金歸買小玲瓏

和子由寒食

寒食今年二月晦樹林深翠已生烟遠城駿馬誰能借  
到處名園意盡便但挂酒壺那計盞偶題詩句不須編  
忽聞啼鴉驚羈旅江上何人治廢田

紅梅

怕愁貪睡獨開遲自恐冰容不入時故作小紅桃杏色

尚餘孤瘦雪霜姿，寒心未肯隨春態。酒暈無端上玉肌。

詩老不知梅格在，更看綠葉與青枝。

石曼卿紅梅詩云：認桃無綠葉，辨杏

有青枝。

和劉景文見贈

元龍本志陋曹吳，豪氣崢嶸老不除。失路今為噲等伍，  
作詩猶似建安初。西來為我風薰面，獨卧無人雪滿廬。  
留子非為十日飲，要令安世誦亡書。

九日尋臻閣黎遂泛小舟至懃師院

湖上青山翠作堆，蔥蔥鬱鬱氣佳哉。  
笙歌叢裏抽身出，雲水光中洗眼來。  
白足赤髭迎我笑，拒霜黃菊為誰開。  
明年桑苧煎茶處，憶著衰翁首重迴。

皎然有九日與陸羽煎茶詩羽自號

桑苧翁余來年九日去此久矣

### 除夜野宿常州城外

南來三見歲云徂，直恐終身走道塗。  
老去怕看新曆日，退歸擬學舊桃符。  
烟花已作青春意，霜雪偏尋病客鬚。  
但把窮愁博長健，不辭醉後飲屠酥。

與毛令方尉遊西菩提寺

二首

推擠不去已三年魚鳥依然笑我頑人未放歸江北路  
天教看盡浙西山尚書清節衣冠後處士風流水石間  
一笑相逢那易得數詩狂語不須刪

路轉山腰足未移水清石瘦便能奇白雲自占東西嶺  
明月誰分上下池黑黍黃粱初熟後朱柑綠橘半甜時  
人生此樂須天賦莫遣兒曹取次知

孔長源挽詞

小偃門頭柳繫船吳山堂上月侵筵潮聲夜半千巖響

詩句明朝萬口傳

長源自越過杭夜飲有美堂上聯句  
長源詩云天目遠隨雙鳳落海門遙

處兩潮趨  
一坐稱善

豈意日斜庚子後忽驚歲在巳辰年佳城一

閑無窮事南望題詩淚灑牋

### 宿州次韻劉涇

我欲歸休瑟漸希舞雩何日著春衣多情白髮三千丈

無用蒼皮四十圍晚覺文章真小技蚤知富貴有危機

為君垂涕君知否千古華亭鶴自飛

涇之兄許亦  
有文死矣

贈惠山僧惠表

行遍天涯意未闌將心到處遣人安  
山中老宿依然在案上楞嚴已不看  
欹枕落花餘幾片閉門新竹自千竿  
客來茶罷空無有盧橘楊梅尚帶酸

初到黃州

自笑平生為口忙老來事業轉荒唐  
長江遶郭知魚美好竹連山覺筍香  
逐客不妨員外置詩人例作水曹郎  
只慙無補絲毫事尚費官家壓酒囊

檢校官例折文  
多得退酒袋

朝雲詩

并引

世謂樂天有粥駱馬放楊柳枝詞嘉其主老病不忍去也然夢得有詩云春盡絮飛留不得隨風好去落誰家樂天亦云病與樂天相伴住春隨樊子一時歸則是樊素竟去也予家有數妾四五年相繼辭去獨朝雲者隨予南遷因讀樂天集戲作此詩朝雲姓王氏錢塘人嘗有子曰幹兒未暮而夭云

豈似楊枝別樂天恰如通德伴伶玄阿奴絡秀不同老

天女維摩總解禪經卷藥爐新活計舞衫歌扇舊因緣  
丹成逐我三山去肯作巫陽雲雨仙

枕榔杖寄張文潛一首時初聞黃魯直遷黔南范  
淳父九疑也

睡起風清酒在亡身隨殘夢雨茫茫江邊曳杖枕榔瘦  
林下尋苗蕪撥香獨步儻逢勾漏令遠來莫恨曲江張  
遙知魯國真男子獨憶平生盛孝章

汲江煎茶

活水還須活火烹

唐人云茶須緩火炙活火煎

自臨釣石取深清大

瓢貯月歸春甕小杓分江入夜鉗茶雨已翻煎處脚松風忽作瀉時聲枯腸未易禁三盃坐數荒村長短更

庚辰歲正月十二日天門冬酒熟予自漉之且漉

且嘗遂以大醉

自撥牀頭一甕雲幽人先已醉濃芬天門冬熟新年喜

麴米春香並舍聞

杜子美詩云聞道雲安麴米春蓋酒名也

菜圃漸疎花漠

漠竹扉斜掩雨紛紛擁裘睡覺知何處吹面東風散纈

紋

贈詩僧道通

雄豪而妙苦而腴祇有琴聰與蜜殊

錢塘僧思聰總角善琴後捨琴而學

詩復棄詩而學道其詩似皎然而加雄放安州僧仲殊詩敏捷立成而工妙絕人遠甚殊辟穀常啖蜜

語

帶烟霞從古少

李太白云他人之文如山無烟霞春無草木

如氣含蔬筍到公

無

謂無酸餽氣也

香林乍喜聞蒼筍古井惟愁斷轆轤為報韓

公莫輕許從今島可是詩奴

趙成伯家有妹麗僕忝鄉人不肯開樽徒吟春雪

謹依元韻以當一笑

繡簾朱戶未曾開  
誰見梅花落鏡臺  
試問高吟三十韻  
何如低唱兩三杯  
莫嫌衰鬢聊相映  
須得纖腰與共回  
知道文君隔青鎖  
梁園賦客敢言才

惠州近城數小山  
類蜀道春與進士許  
殺野步會意處飲之  
且醉作詩以記適參  
寥專使欲歸使持此  
以示西湖之上諸友  
庶使知余未嘗一日  
忘湖山也

夕陽飛絮亂平蕪萬里春前一酒壺  
鐵化雙魚沈遠素  
劍分二嶺隔中區  
花曾識面香仍好  
鳥不知名聲自呼  
夢想平生消未盡  
滿林烟月到西湖

八月七月初入贛過惶恐灘

七千里外二毛人  
十八灘頭一葉身  
山憶喜歡勞遠夢  
地蜀道有錯喜歡名惶恐泣孤臣  
長風送客添帆腹  
積鋪在大散關上

雨扶舟減石鱗便合與官充水手  
此生何止畧知津

立春日小集呈端叔

白髮已十載青春無一堪不驚新歲換聊與故人談牛  
健民聲喜鴉嬌雪意酣霏微不到地和煖要宜釐歲月  
斜川似風流曲水慙衰懷久灰槁習氣尚饒貪白啖本  
河朔紅消真劍南辛盤得青韭臘酒是黃柑歸卧燈殘  
帳醒聞葉打庵須煩李居士重說後三三

送范景仁遊洛中

投老身彌健登山意未闌西遊為櫻筍東道盡鸛鷺杖  
屨攜兒去園亭借客看折花斑竹寺弄水石樓灘鶯馬

哀憐白驚雷怯笑韓薛書標洞府松蓋偃天壇試與劉  
夫子重尋靖長官

同王勝之遊蔣山

到郡席不煖居民空惘然好山無十里遺恨恐他年欲  
款南朝寺同登北郭船朱門收畫戟紺宇出青蓮夾路  
蒼髯古迎人翠麓偏龍腰蟠故國鳥爪寄層巔竹杪飛  
華屋松根泣細泉峯多巧障日江遠欲浮天畧約橫秋  
水浮屠挿暮烟歸來踏人影雲細月娟娟

靈上訪道人相遇

花光紅滿欄草色綠無岸不逢青眼人長歌白石澗

初入廬山

青山若無素偃蹇不相親要識廬山面他年是故人  
出都來陳所乘船上有題小詩不知何人作有感  
予心者聊以和之

潁水非漢水亦作葡萄綠恨無襄陽兒令唱銅鞮曲

軒牕

東鄰多白楊夜作雨聲急牕下獨無眠秋蟲見燈入

促織

月叢號耿耿露葉泣溥溥夜長不自煖那憂公子寒

吉祥寺賞牡丹

人老簪花不自羞花應羞上老人頭醉歸扶路人應笑  
十里珠簾半上鉤

望湖樓醉書二絕句

黑雲翻墨未遮山白雨跳珠亂入船卷地風來忽吹散

望湖樓下水如天

放生魚鼈逐人來  
無主荷花到處開  
水枕能令山俯仰  
風船解與月裴回

飲湖上初晴後雨

水光瀲灩晴方好  
山色空濛雨亦奇  
欲把西湖比西子  
淡妝濃抹總相宜

贈別

青鳥銜巾久欲飛  
黃鸝別主更悲啼  
慙慙莫忘分攜處

湖水東邊鳳嶺西

書辨才白雲堂壁

不辭清曉叩松扉  
却值支公久不歸  
山鳥不鳴天欲雪  
卷簾惟見白雲飛

送蜀人張師厚赴殿試

忘歸不覺鬚毛斑  
好事鄉人尚往還  
斷嶺不遮西望眼  
送君直過楚王山

惠崇春江晚景

竹外桃花三兩枝  
春江水暖鴨先知  
萋萋滿地蘆芽短  
正是河豚欲上時

書李世南所畫秋景

野水參差落漲痕  
疎林欹倒出霜根  
扁舟一櫂歸何處  
家在江南黃葉村

書林次中所得李伯時歸去來陽關二圖後

二首

不見何戡唱渭城  
舊人空數米嘉榮  
龍眠獨識慙慙處  
畫出陽關意外聲

兩本新圖寶墨香樽前獨唱小秦王為君翻作歸來引  
不學陽關空斷腸

澄邁驛通潮閣

餘生欲老海南村帝遣巫陽招我魂杳杳天低鷓鴣沒處  
青山一髮是中原

僕年三十九在潤州道上過除夜作此詩又二十  
年在惠州錄之以付過

寺官官小未朝參紅日半牕春睡酣為報鄰鷄莫驚覺

更容殘夢到江南

寒具

纖手搓來玉數尋  
碧油輕蘸嫩黃深  
夜來春睡濃如酒  
壓褊佳人纏臂金

絕句

柴桑春晚思依依  
屋角鳴鳩雨欲飛  
昨日已收寒食火  
吹花風起却添衣

答田國博

二首

歲月翩翩下坂輪歸來杏子已生仁深紅落盡東風惡  
柳絮榆錢不當春

火冷飴稀杏粥稠青裙縞袂餉田頭大夫行役家人怨  
應羨居鄉馬少游

淮上蚤發

淡月輕雲曉角哀小風吹水碧鱗開此生定向江湖老  
默數淮中十往來

望湖樓晚景

青山斷處塔層層  
隔岸人家喚欲應  
江上秋風晚來急  
為傳鐘鼓到西興

西湖壽星院此君軒

卧聽謖謖碎龍鱗  
俯看蒼蒼立玉身  
一舸鷗夷江海去  
尚餘君子六千人

寒食夜

漏聲透入碧牕紗  
人靜鞦韆影半斜  
沈麝不燒金鴨冷  
淡雲籠月照梨花

梅花 二首

梅梢春色弄微和，作意南枝翦刻多。  
月黑林間逢縞袂，霸陵醉尉誤誰何。

月地雲堦漫一樽，玉奴終不負東昏。  
臨春結綺荒荆棘，誰信幽香是返魂。

張翰畫像

浮世功名食與眠，季膺真得水中仙。  
不須更說知幾蚤，真為鱸魚也自賢。

讀開元天寶遺事 二首

潭裏春船百倍多  
廣陵銅器越溪羅  
三郎官爵如泥土  
爭唱弘農得寶歌

琵琶絃急袞梁州  
羯鼓聲高舞臂鞦  
破費八姨三百萬  
大唐天子要纏頭

八月十五日看潮 二首

萬人鼓噪懾吳儂  
猶似浮江老阿童  
欲識潮頭高幾許  
越山渾在浪花中

江神河伯兩醺鷄海若東來氣吐霓安得夫差水犀手  
三千强弩射潮低

贈莘老

三首

嗟余與子久離羣耳冷心灰百不聞若對青山談世事  
當須舉白便浮君

天目山前綠浸裾碧瀾堂下看銜鱸作堤捍水非吾事  
閒送苔溪入太湖

三年京國厭藜蒿長羨淮魚壓楚糟今日駱駝橋下泊

恣看脩網出銀刀

山村 二首

老翁七十自腰鎌  
慙愧春山筍蕨甜  
豈是聞韶解忘味  
邇來三月食無鹽

杖藜裹飯去匆匆  
過眼青錢轉手空  
贏得兒童語音好  
一年強半在城中

陳季常所畜朱陳村嫁娶圖

我是朱陳舊使君  
勸耕曾入杏花村  
而今風物那堪畫

縣吏催錢夜打門

朱陳村在徐州蕭縣

縱筆二首

父老爭看烏角巾  
應緣曾現宰官身  
谿邊古路三叉口  
獨立斜陽數過人

北船不到米如珠  
醉飽蕭條半月無  
明日東家知祀竈  
隻鷄斗酒定膳吾

章惇

附

建州浦城人第進士調商洛令熙寧初王安石秉政悅其才用為編修三司條例官出任湖南北察

訪使召還報知制誥罷知湖州元豐三年拜參知政事尋罷知蔡州五年召拜門下侍郎哲宗即位知樞密院事宣仁后聽政惇與蔡確矯倡定策功會確罷惇不自安乃駁司馬光所更役法累數干言務以求勝其說不行復憤患爭辯屢前宣仁后怒劉摯蘇軾朱光庭王巖叟交章擊之出知汝州从哲宗親政有復熙寧元豐之意有起惇為尚書左僕射於是專以紹述為事凡元祐所罷一切復之元祐當局諸正人一切日以奸黨起問丈之獄羅織貶竄正類胥空甚至欲追廢宣仁后則惇亂不道之尤矣

## 玉光亭

千層懷玉對軒牕池上新亭見玉光祇此便堪為吏隱

神仙官職水雲鄉

答劉子宣

洞霄宮裏一閒人東府西樞老舊臣  
多謝姑蘇賢太守殷勤分送洞庭春

舒亶

附

字信道號亦樂居士初官臨海縣尉王安石當國  
聞其能為改官至御史裏行後同李定陷蘇軾於  
罪益懷險人也

夢入天宮

天風吹散赤城霞  
染出連雲萬樹花  
誤入醉鄉迷去路  
旁人應笑却還家

村居

水遠陂田竹遶籬  
榆錢落盡槿花稀  
夕陽牛背無人卧  
帶得寒鴉兩兩歸



宋元詩會卷二十一